

# **ЧАРМДЎЗЛИК ВА МЕТАЛЛСОЗЛИКНИНГ ХАЛҚ АМАЛИЙ**

## **САНЬТИДАГИ ЎРНИ**

Эшбоев Шахриёр Фурқат ўғли, ЖДПИ Жисмоний маданият факультети  
I босқич магистранти

[furqat7312@mail.ru](mailto:furqat7312@mail.ru)

Тарихий манбаларда туркий халқларнинг чорвачилик, боғдорчилик, лалми ва суғорма дәхқончилик, савдо ҳамда ҳунармандчилик билан шуғулланганлиги кўп эслатилади. Бироқ, юқорида санаб ўтилган хўжалик турларидан чорвачилик қадимги аждодларимиз ҳаётида алоҳида ўрин тутган. Чорвачиликнинг кўчманчи ҳаёт тарзи, нокулай табиий шароитда чорва ортидан узоқ масофаларга кўчиб юриш ва яйловлар учун курашни тақозо этган. Шунинг учун қадимги чорвадорлар бир пайтнинг ўзида чавандоз (суворий)лик ва ҳарбий соҳа сирларини мукаммал эгаллаган. Бу эса аждодларимиз кийим -бошининг отда чопиш, тоғу тошда юриш, иссиқ-совуққа мос бўлиши, шунингдек тасодифий ҳарбий тўқнашувларда жанг олиб бориш ва ҳимояланишга жуда қулай бўлишини тақозо этган.

Жиззах воҳасида аҳолининг кўнчилик маҳсулотларига бўлган талаби маҳаллий шароитда ўзлари томонидан қондирилган. Воҳанинг ҳар бир қишлоғида кўнчилик билан шуғулланувчи маҳаллалар бўлган. Масалан, Фориш, Бахмал, Зомин туманидаги чармгарлар асосан терига ишлов бериш ва теридан маҳсулотлар тайёрлаш билан шуғулланганлар. Ҳунармандчиликнинг бу тури ҳам қадим анъаналарга эга бўлиб К.Ш. Шониёзовнинг ёзишича, “Қанғарлар даврида чармдан ишланган буюмлар ҳам кенг тарқалган. ... Чарм маҳсулотларидан қилинган буюмлар ҳамда кийимларни кўчманчи ва ярим ўтрок яшаб, чорва билан шуғулланиб келган қанғарлар ишлатганлар. Чармдан ўқдонни солиб юрадиган чарм халталар, пичноқ қинлари, саноч, меш ва бошқа буюмлар тайёрланган” [1: 110]. Кейинчалик ҳам бу анъана давом эттирилиб, юртимиз ўзининг чарм маҳсулотлари билан машҳур бўлган. Яқин вақтларгача ота-боболармиз

чармдан оёқ буюми (чориқ) – пошнасиз этик, отда юришга мўлжалланган баланд пошнали этик, пўстин ва тумоқлар ясад кийишган. Тўшама буюмлар, филоф, меш ва бошқа зарурий рўзғор буюмлари тайёрланган. Ҳозирги пайтда ҳам воҳанинг чорвадор аҳолиси орасида чармдан қўплаб буюмлар тайёрлаш амалиёти сақланиб колган. Шундай қилиб, кийим-бош ва қундалик турмушда ишлатиладиган жиҳозларни тайёрлашда чорва терисидан фойдаланиб, териларнинг асосий қисми маҳаллий чорва (ҳар хил турдаги мол, қўй, қўзи, эчки, туж, от) ва ёввойи ҳайвонларнинг терисидан хонаки технология асосида етиширилган.

Аждодларимз ҳарбий кийим-бошларида металлдан ясалган буюмлар ҳам муҳим ўрин тутган. Улар турли хил металлдан ясалган жанг қуролларида ташқари, зирҳ, камар тўқаси, узанги, сувликлар кўринишида учрайди. Юртимизда худудида ўрганилган мозорқўрғонларда қайд этилган темирдан ясалган ўткир тифли қуроллар – қилич, ханжар, камон ўқлари, пичноқ ва бошқалар аждодларимизнинг хунармандчиликни металлсозлик соҳаси ҳам юксак даражада ўзлаштирганликларини кўрсатади. Дарҳақиқат, чорвадорлар ҳарбий тадбирлар муваффақиятини белгиловчи темир қуроллар ишлаб чиқаришда моҳир уста бўлишган.

Шарқий Туркистоннинг Тангритоғ ёнбағирлари (Олой сойи)да сакларга оид қабрлар ва турагар жой қолдиқларидан қазиб олинган нарсалар ичидаги тилла, кумуш, мис, темир, сопол, ёғоч, ипак ва лак буюмлари асосий ўринни эгаллайди. “Сакларда айниқса, тилладан ясалган буюмлардан фойдаланиш биринчи ўринда турган” [2: 208]. Византия элчиси Земархга туркутлар сотиладиган темирни таклиф қилганларида ҳайрон бўлиб қолади ва бу уни ҷалғитиши учун атайлаб қилинаяпти, деган шубҳага боради, “одатда уларда темир топилиши анча мушкул” деган гап юради[3: 52]. Аслида, туркийлар металлургияни тараққий эттириб, ўз қўшинини қайта қуроллантириб, зирхли суворилардан танланган зарбдор қисмлар ташкил эта олган эдилар. Улар шохли ёй, зирҳ қўйлак, найза, қилич, ўткир суворий шамширлари билан қуролланганлар.

Фикримиз тасдиғи сифатида, 1984 йили Сирдарёдан топилган дубулға эътиборингизни қаратсак. Ушбу дубулға бундан 2000 йил олдин ясалган бўлиб, унинг зирхи қўшқаватли ва турли металл қотишмаларидан иборат. Мутахассислар уни ясаш учун маҳаллий хом ашё, жумладан, Қорамозор рудаси асосий материал бўлиб хизмат қилган, деб тахмин қиласидилар[4: 10-февраль]. Туркистон тоғларининг шимоли-ғарбида Уструшона тоғлари – Моргузар тоғларининг жануби-ғарбида 4 та тоғ металл зонаси, Чимқортогдаги Лятабанд, Боғмозор, Моргузор тоғларидаги Шойбоқсой ва Миқсой мавжуд бўлган. Руда қазиб олиш ва қайта ишлаш марказлари Шойбоқсой ва Миқсойда мавжуд бўлган[5: 13-14]. Бу ерда Ўрта Осиёдаги йирик, рудани қазиб олишдан қора металлдан тайёр маҳсулот ясашгача бўлган, ишлаб чиқаришнинг тўлиқ шакли – ихтисослашган металлургия маркази мавжуд бўлган. Бу маълумотлар чорвадорлар амалий санъатида металлсозлик соҳаси ҳам муҳим ўрин тутганлигини ва унинг юқори даражада тараққий этганлигидан далолат беради.

Шундай қилиб, аждодларимизнинг қадимги даврдаги кийим бошлари турли хил шароитда яшаш, жанговарлик юришларида қатнашиши учун жуда қулай бўлган. Ушбу либосларнинг тасвирий санъат асарлари ва археологик ёдгорликларда сақланиб қолган намуналари бугунги кундаги (замонавий)чавандозлар киядиган уст-бошларга жуда ўхшайди. Демак, ҳозирги от спорти билан боғлиқ миллий спорт кийимларининг илдизи қадим тарихимизга бориб тақалади. Уларни изчил ўрганиш ва халқимиз орасида кенг тарғиб қилиш эса, бугунги куннинг долзарб масалаларидан биридир.

### **Фойдаланилган адабиётлар:**

1. Хўжаев А. Фарғона тарихига оид маълумотлар – Ф.: “Фарғона”, 2013. 208, 230 бетлар.
2. Шониёзов К.Ш. Қанғ давлати ва қанғлилар – Т.: 1990. 109,110 бетлар.
3. Stein A. Ипегтост Asia – V.: 1928. Vol.II, p. 614.
4. Қурбонов А.Э. Шимолий Сурхон воҳаси аҳолиси анъанавий маданиятининг этник ва локал хусусиятлари (XIX аср охири – XX

асрнинг биринчи ярми) Тарих фанлари номзоди илмий даражасини  
олиш учун ёзилган дисс... –Т.: 2009. 71 бет.

5. Комсомольская правда, 1984, 10- февраль.